

Аз убо раб твой ни земли Резанския слышах, ни на сердце мое взыде когда. И не вем камо да иду к земли той — на восток или на запад, на юг или на север“. И сия тому помышляюще, в третью же ночь явился ему святой Николай чудотворец и ткну Евъстафия в ребра его, повелевая ему немедленно итти на восток в великую Россию, и обещаая ему путь показати до Резанския земли. Евъстафий же от сего видения вельми вострепета и востав смущен, помышляя в сердцы своем како отитти от града Корсуня. И о сем в печали и во унынии мнозе бысть. И абие нападе нань болезнь главная, и от болезни тоя нападе на очи его, яко чешуя, и бысть слеп — ни света солнечнаго видети могий. Он же на покаяние прибеже к богу, со многими слезами каюся, и святого Николая в помощь призывая, в купе же и прощения прося, припадая ко святому образу его, и с рыданием моля: „О великий святителю Николае, согрешил пред богом и не послушах твоего повеления; прости мя неключимаго раба твоего“. Великий же в чудесех святой Николай паки тому во сне является и прозрение ему, и болезни пременение дарует, глаголя: „Не полезно ти есть итти чрез землю поганых половец, но паче достоит итти во устие Днепръцкое и в море Варяжское. И Понтийским морем итти в Немецкие области, и оттоле сухим путем до великаго Новаграда, и до Резанские земли путь есть невозбранец“. Евъстафий же от святого сия слышав, и востав от сна своего, и абие взем чудотворный святого образ, поят же и супругу свою Феодосию, и сына своего Евъстафия, и единого от клирик своих, и изыде из града, остави все свое имение. И поиде в путь, яко же ему святой Николай чудотворец повеле. И богу его соблюдающе, доиде устия Днепръскаго и моря Понтийскаго, се же именуемо есть Руское, и вниде в корабль, и иде Понтийским морем. И потом вниде в море Варяжское, и прииде в Немецкую область во град нарицаемый Иесь. И прибысть тамо дней мало и оттоле поиде сухим путем чрез Немецкие области. И начаша быти от образа святителя Николая чудотворца велия чудеса, яко не токмо писанию предати мощно, но не исчести множества ради. И прииде в Великий Новград, и пребысть тамо многии дни; чудесем же наипаче умножившимся от чудотворного того образа. Жена же Евъстафиева действием дияволим не восхоте итти во след чудотворнаго образа и скрыся от своего мужа, понеже возлюби Великий Новград. И абие в болезнь впаде, и разслабеша вся уды ея, и бысть яко мертва и недвижима, но точию едино дыхание в персех имея. Нецый поведаша Евъстафию о жене его и болезни ея, он же слышав сия, припаде ко святому образу святителя Николая со слезами, моляся о согрешившей. И абие жена в том часе здравие получи. Евъстафий же взем чудотворный святителя Николая образ и иде в путь свой, и егда доиде Резанския земли, нача в себе помышляти: „Се земля Резанская, и камо хошу итти, и покой обрести“. Великий же святитель и чудотворец Николай является места того князю Феодору — сыну благовернаго князя Георгия Игоревича Резанскаго, — той бо места того бяхе господин, иде же ныне град Зараск, и рече: